

PERAG

e choman paotr yaouank

Diskan

*Setu aze evit petra
Ne fell ket d'in fortunia.*

1

Kalzik a dud a jom souezet
Dre ma ne 'z oun ket c'hoaz fortuniet ;
Mont 'rân da gounta deoc'h va rezon,
'Velse ne jomot ket en eston.

2

Eur pennad a zo em eus bet c'hoant
Ober al lez da eur plac'hik koant ;
Allaz ! trumm goude 'm euz bet gwelet
'Vel ar re all ez oa dirollet.

3

Eur poent zo bet e vezent gwelet
Gant chaliou kaer ha koeflou brodet
Siouaz breman en o gwiskamant
'Z eus eur maread a jenchamant.

4

Lostennou berr beteg an daoulin
Ma vez an dud dezo o c'hoarzin,
Betek paotred yaouank 'vez gwelet,
Ruz gant ar vez o vont da guzet.

5

Gwechall d'o digas da di o zad
Eun tok ledan voulouzet 'oa mat ;
Breman 'ranker kaout eur « chapeau mou »
Eun tamm kanenn hag eur manegou.

6

Berniajou poultr war o figuriou
Ha pentur ruz war o muzellou,
Evit beza muioc'h delikat,
'Lakeont traou du war o daoulagad.

7

Gant kalz anezo bleo trouc'het
Divalo-mez, farsus da welet :
Beteg ar chas 'velet anezo
A stag diouztu da harzal outo.

8

En o zreïd koz tammou bouteier
Seuliou uhel, traou fall ha dister,
Lereier ken sklear a vez ganto
Ma vez gwelet o c'hrac'henn dreizo !

9

Boucles d'oreilles var o diskouarn
Eun tamik *sacoch* en o daouarn,
Kalz gwalennou var o bizied,
Evit klask deseо an holl botred

10

Maread anezo a vez gwelet
'C'h ober ardou 'vel an *douristed*,
Ha pen em gavont ebarz o zi,
'Vez ket eun tain bara da zrebi.

11

Kalz a zo c'hoaz, pa deu an noz,
Pa vez d'an oll poent mont da repoz,
A rank gourvez var eur bank torret
N'o deuz ket eur gwele da gousket.

12

Poent eo d'in paouez ha chom a zav
Gwest e ve ar merc'hed da facha
Met 'pad ma c'heuilhint giziou nevez
Morse ne gemerin eur vaouez.

FRANCIS MOAL

(*Reproduction interdite*)